

ARRÜNA ÑACONOMOSORRTI SAN PABLO ÜMO BAMA GALATAS

1 ¹ Arrüñü Pablo apóstol ñü. Pero champürrtü yacüpucu mañoñüncatai, ta ui noñemarrti Jesucristo, naqui süboricoti tato eanaqui macoiñoca uiti Tuparrü. ² Arrüñü ichepe namanaiña bama masaruquитайqui aboma auna supaquionco tanu aume bama icocoromati Jesús au manu cürri Galacia. ³ Tari icunusüancanati año Bae Tuparrü y arrti Señor Jesucristo. Taiquiana urria nabaca. ⁴ Arrti Jesús itorrimianatiyü tücañe, nauqui aconti otopiqui, nauqui puerurrü arrimiaca nomünantü osoi. Arrüna tiemporrü caüma tarucu nomünantü ui macirrrianuca. Pero uiti Jesús utaesübuca eanaqui nomünantü, itopiqui sane nirrancarrti Tuparrü naqui Uyai. ⁵ Tapiü tacürusu numaquionco aübu numanauncu ümoti. Amén.

Champü quiatarrü manunecatarrü uiche utaesübu eanaqui nomünantü

⁶ Isütöbica nurria aboi, masaruquитайqui, itopiqui chauqui tapiñocota arrüna manunecatarrü icütüpüti Tuparrü, naqui itasuruti año aübu nanaiña nibuenucurrti. Macumananati aume ausüboriquibo auquiti Jesucristo. Pero arraña chauqui tapasutio quiatarrü manunecatarrü churriampü, arrüna uiche chüpuerurrüpi aye aboi esati Tuparrü. ⁷ Ta champü quiatarrü manunecatarrü icu na cürri uiche utaesübu eanaqui nomünantü. Pero aboma bama itachemacanama año, nauqui apiñoco. Uimia campiabo arrüna omirriantai manunecatarrü icütüpüti Jesucristo. ⁸ Arrtü anati naqui campiabo uiti arrüna manunecatarrü icütüpüti Jesucristo, arrüna tüsuburapoi ausucarü, tari paurramanati uiti Tuparrü. Champü nümoche arrtü arrüñü o arrtü arrti taman ángel auqui napese, tiene que suipiaurrama uiti Tuparrü. ⁹ Chauqui tüsuburapoi tücañe ausucarü arrüna sane y caüma surapoi tatito: Arrti naqui urapoiti ausucarü quiatarrü manitacarrü cütüpüti Jesucristo, arrüna chisiuquipü tacana arrüna surapoi ausucarü tücañe, tari paurramanati uiti Tuparrü.

¹⁰Arrüna sucanañü sane champürrtü nauqui apucünuma macrirrtianuca isuatañü, ta nauqui apucünuti Tuparrü isuatañü. Arrtü irrancapü isamune nauqui apucünuma macrirrtianuca isuatañü, chüpuerurrüpi yaserebi ümoti Cristo.

Arrüna nauquiche aisamunutiüyü Pablo apóstol

¹¹Irranca nauqui atusi nurria aume, masaruquитайqui, arrüna urria manitacarrü, arrüna tüsurapoi ausucarü. Chütonempü ñanitacarrüma mañoñüncatai. ¹²Champürrtü yasutiu pünanaquiti ñoñürrü, ni iñununecacapü uiti cualquierarrü. Ta yasutiu nurria uiti Jesucristo.

¹³Arraño tamoncoi causane nisüboriqui tücañe, nauquiche yaca isiu ñanunecacarrüma bama israelitarrü. Tarucu nichübori ümo bama icocoromati Jesús, taquisürüma sobi, nirranca nauqui atacüruma.

¹⁴Arrümanu ñanunecacarrüma bama israelitarrü manrrü iyebo sobi pünanaqui bama isumpañeru, numo yacaiqui taha eana niyesa genterrü. Icocota y rranunecaca ito arrüba yacüpucurrüma bama mañantibuca aübu tarucu narucurrü iñemo.

¹⁵Pero numo chiyacaiquipü icu cürrü, arrti Tuparrü titacümanauncunutiñü ui tarucu nisua ümoti. ¹⁶Iñatai manu nanenese tücañe ensümunu uiti Tuparrü, anche aitusiancanatiti Aütörri isucarüñü, ui nirrancarrti nauqui suraboi arrüna ñemanauncurratoe nurarri isucarü bama chicocoromati. Nauquiche pasabo arrüna sane, champürrtü yacatü rranquiriu pünanaqui macrirrtianuca. ¹⁷Ni yacatüpi to au Jerusalén rranquiriu pünanaqui bama primero apostolerrü rropünanaquiñü. Ta yacatü taha au manu cürrü nürirri Arabia, y auqui taha ise tato besüro sobi au manu pueblurrü Damasco. ¹⁸Aüboqui pürücü trerrü añoca yacatü au Jerusalén yapasearati Pedro, aüboqui isuputarati. Anancañü ichepeti quince naneneca. ¹⁹Arrübama maquiataca apostolerrü chisuñucapüma au manu tiemporrü, cunauntañatiatai Jacobo, naqui yaruquitörri Señor. ²⁰Isucarüti nurria Tuparrü surapoi ausucarü que arrüna nirraconomoso aume bien ñemanauncurratoe. ²¹Auqui manu yerotü au manio cüca Siria y Cilicia. ²²Arrümanuma masaruquитайqui au nürirrti Jesús au manu cürrü Judea chisuputarapümañünqui nurria. ²³Oncoimiantai arrüba manitacaca sane: “Arrti naqui tücañe tüboriorrü oemo, naqui uiche utaquisürücatai, pero caüma manunecanati ümo macrirrtianuca nauqui aicocoromati Jesucristo, abu tücañe rranrrtipü nauqui uiñoco numacoconauncu ümoti Cristo”. ²⁴Sane nauquiche machampiencanama ümoti Tuparrü ichopiquiñü.

Yasuriurumati Pablo bama maquiataca apostolerrü

2 ¹Nauquiche tübupasao catorce añoca, yacatü tatito au Jerusalén ichepeti Bernabé. Iquiacatito Tito isiuñü. ²Yacatü taha itopiqui arrti Tuparrü icüpurutiñü. Anancañü au manu reunión ichepe bama üriatu bama icocoromati

Jesús taha. Surapoi isucarüma arrüna omirria manitacarrü ümo bama chütipü israelitarrü, arrüna uiche utaesübu eanaqui nomüinantü. Irranca atusi ñemo arrtü urria ümoma, tapü ümonatai nirratabacaca. ³Pero champürrtü asioma icuatati Tito nauqui asuriutipü nesarrüma señarrü bama israelitarrü, nürirri circuncisión, abu arrti chütipü israelitarrti. ⁴Rrapariquia aübu bama üriatu bama icocoromati Jesús, itopiqui aboma bama namatü suiñemo “saruqui”, abu ñapanrrüma. Ñanamacü eana bama icocoromati Jesús anecanatai, nauqui arrüpiama arrtü cocono uimia nanaiña arrüba yacüpucurrüma bama israelitarrü, o champü. Rranrrüma nauqui uicoco nanaiña yacüpucurrüma. Pero arrti Jesús chauqui titaesümunuti oñü ñünana manio bacüpucca, arrüba botorrio tücañe uiti Moisés. ⁵Sane nauquiche chüsupasutiupü nüriacarrüma bama mañoñünca, tapü mameso arrüna ñemanauncurratoe manitacarrü icütipüti Jesucristo.

⁶Arrübama üriatu bama icocoromati Jesús au Jerusalén champü piquiataca bacüpucca uimia ñemo. Champü nümoche sobi nüriacarrüma, itopiqui ümoti Tuparrü ichepatai nusaca. ⁷Así que chauqui tütusio ümoma que arrti Tuparrü icüpurutiñü rranuneca ümo bama chütipü israelitarrü tacana yacüpucurrü ümoti Pedro tücañe nauqui anunecati ümo bama israelitarrü. ⁸Tusiatai yayuracarrti Tuparrü ümoti Pedro, nauqui ane icüsübuti, nauqui anunecati ümo bama israelitarrü tacana apóstol ti ümoma. Isiatai tusio yayuracarrti Tuparrü ñemo, bacheboti isüsübu nauqui rranuneca ümo bama chütipü israelitarrü.

⁹Tonema arrübama üriatu bama icocoromati Jesús au Jerusalén: Arrti Jacobo, arrti Pedro y arrti Juan. Numo tütusio ümoma arrüna yacüpucurrü Tuparrü ñemo, itorrimiatama ñemo nehesüma y ümotito Bernabé, na atusi que tüyasuriuruma somü icumpañerutubuma. Namatü suiñemo: “Amecosi aburaboi nurarrti Tuparrü au ba piquiataca nacioneca. Tapü arrüsomü suburaboira auna isucarü bama israelitarrü”. ¹⁰Pero ñanquitioma somopünanaqui tapü tacürusu supaquionco iyo bama poberrü au Jerusalén. Sane nauquiche nantarrü yapachea niquiubunü nauqui rrayura ümoma.

Arrti Pablo icuansomoconotiti Pedro

¹¹Auquimanu isüñucati tatito Pedro, numo cuati au manu pueblurü Antioquía. Acamanu icuansomococati, itopiqui tusiatai ñemo arrüna nipünatenti. ¹²Ta basoti aübu bama chütipü israelitarrü, bama icocoromati Jesús. Auqui aiñanaimia bama maquiataca israelitarrü auqui Jerusalén esauiti Jacobo. Arrti Pedro caüma chübasotiquipü aübu bama chütipü israelitarrü. Ñanatiyü peese pünanaquimia. Birrubuti ñünana bama maquiataca, itopiqui churriampü ümoma arrüna basoti ichepe bama chütipü israelitarrü. ¹³Arrübama maquiataca israelitarrü aboma acamanu isamutema isiatai, hasta arrti Bernabé isamutenti isiuquimia, mapañatito. ¹⁴Arrüñü yarrtai arrüna churriampü isamutema. Chisamutempüma isiu arrüna ñemanauncurratoe manitacarrü uiti Tuparrü. Auqui sucanañü ümoti Pedro isucarü namanaiña: “Arrücü Pedro israelitarrücü, pero ta chaviviquiapü tacana yaviviqui bama israelitarrü, abu arrücü israelitarrücü. ¿Causanempü acüpu

caüma ümo bama chüitüpi israelitarri nauqui avivimia tacana bama israelitarri? ¹⁵Ñemanauntu te israelitarri oñi auqui maübo usaca icu na cürrü. Champürrtü tacana piquiataca nacioneca, ane nomünantü oboi. ¹⁶Pero tusio nurria oemo que artti Tuparrü yasuriuruti oñi, arrtü uicococati Jesucristo, champürrtü ui na uicocota nanaiña nüriacarrü uiti Moisés. Sane nauquiche arroñi ito sopicococati Jesucristo, nauqui asuriuruti oñi Tuparrü. Itopiqui chupuerurrüpi asuriuruti oñi ui arrüna numacoconauncu ümo nüriacarrü”.

¹⁷Urrianca te nauqui asuriuruti oñi Tuparrü auqui nacarrti Cristo. Uirri tusio que ane nomünantü osoi ito. ¿Pero acasopü basuquiucati Cristo, nauqui manrrü anempü nomünantü osoi? No, champü. ¹⁸Uiñocota manu nüriacarrü uiti Moisés, choñoncapütüqui ümo, itopiqui oñoncatü caüma ümoti Cristo. Sane nauquiche ane nuiptüate, arrtü oñoncatü tatito caüma ümo nüriacarrü. ¹⁹Arrüñi leheboñi nurria nüriacarrü. Tusio iñemo, ta chüpuerurrüpi icoco. Sane nauquiche iñocota. Yaca tacanarrtü isonca pünanaquí. Ñoncatü caüma ümoti Cristo. Isüboriquia ümoti Tuparrü. ²⁰Yaca tacanarrtü isonca apü curusürrü ichepeti Cristo. Sane nauquiche caüma isüboriquia aübuti Cristo, anati au niyausasi. Chisüboriquiaiquipi cunauntañañi, y enterurrü nisüboriqui icu na cürrü icococati naqui Aütörri Tuparrü. Ñoncatü ümoti, itopiqui isuasürüca ümoti, y artti coiñoti ichopiquiñi. Uiti urria nisüboriqui. ²¹Yasutiu arrümanu ñacumanatarrti Tuparrü iñemo. Arrüna niconcorrti Cristo otopiqui, ta nauqui utaesübu eanaqui nomünantü. Itopiqui arrtü artti Tuparrü yasuriuruti oñi ui arrüna arrtü uicocota nüriacarrü uiti Moisés, entonces champü nümochezü aconti Jesús apü curusürrü.

Osüboriquia ichepeti Tuparrü itopiqui oñoncatü ümoti

3 ¹Tapü tarucapae nausonsoco, masaruquitaquí au Gálata. iÑacutipü naqui matachemacana aume, nauqui tapü apicocotaiquí arrüna nirranitaca aume icütüpiüti Jesús, naqui coiñoti apü curusürrü! ²Apaquionsaño, artti Espíritu Santo cuati tücañe au nabausasi itopiqui amoncatü ümoti Jesús, champürrtü itopiqui arrüna apicocota nüriacarrü. ³Tarucapae nausonsoco. ¿Causanempü caüma apapensa que puerurrü urria nausüboriqui aboiyapatoe, abu tücañe ui yayuracarrti Espíritu Santo. ⁴¿Taqui ümonatai manu tarucu nautakisürücü auqui nacarrti Jesús? No, chüpuerurrüpi ümonatai. ⁵Artti Tuparrü icüpurutiti Espíritu Santo aume, y masamunutito milagrorrü abarrüpecu. Acasopü isamutenti arrüna sane ui arrüna apicocota nanaiña nüriacarrü? No, champü. Ta ui arrüna amoncoi nürirrti Jesús, y apasuquiucati.

⁶Amoncoi nürirrti Abraham, naqui bavivicoti tücañe icu na cürrü. Artti oncotitü ümoti Tuparrü. Ui arrüna sane artti Tuparrü pucünuñati. ⁷Sane nauquiche tütusio oemo que namanaiña bama oncomatü ümoti Tuparrü, tonema bama tacana nesarrti familiarrü Abraham. ⁸Auqui ñemonco tusio icuqui Nicororrü que artti Tuparrü yasutiuti ümo bama oncomatü ümoti auqui nanaiña nacioneca. Sane nauquiche tücañe urapoiti Tuparrü isucarüti Abraham

arrüna urria manitacarrü sane: “Auqui naca caüma bocurusüo nanaiña nacioneca icu na cürrü, y nanaiña bama oncomatü iñemo tacanacü”. ⁹Sane nauquiche curusüoma caüma namanaiña bama icocoromati Tuparrü, bama oncomatü ümoti, tacanatito Abraham curusüoti ui ñacoconauncurrü ümoti.

¹⁰Tapü arrüibama oncomatü ümo nüriacarrü uiti Moisés paurramanama uiti Tuparrü, itopiqui ane corobo sane: “Tiene que paurramanati naqui chicocotatipü y chisamutentipü nanaiña arrüba bacüpucuca, arrüba abe bocorobo icu na librurrü nesa nüriacarrü”. ¹¹Ui arrüna sane tusio nurria que champüti puerurrü icu na cürrü aye uiti esati Tuparrü ui arrünampü ñacoconauncurrü ümo na nüriacarrü. Nantü sane icu Nicororrü: “Arrübama oncomatü ümoti Tuparrü aübu nanaiña nausasürrüma, tonema bama urria nacarrüma au narrtarri Tuparrü. Tonema bama süboricoma ümo para siemprerrü ichepeti. ¹²Tapü nüriacarrü champürrü nantü nauqui oñoncatü ümoti Tuparrü, ta nantü nauqui uicocorio nanaiña arrüba bacüpucuca, nauqui aye osoi nosobiriqui ichepeti Tuparrü, (abu champüti naqui puerurrü).

¹³Tiene que upaurrama uiti Tuparrü, itopiqui chuicocoquiopü nanaiña bacüpucuca. Pero arri Cristo chauqui titaesümununuti oñü pünanaqui manu mapaurramacarrü, itopiqui arri anancati paurramanati uitobo, nauquiche anancati tücañe apü curusürrü. Nantü te sane icu Nicororrü: “Paurramanati naqui crabu apü curusürrü”. ¹⁴Sane nauquiche caüma cuatü ñacususüancacarrü Tuparrü auqui nacarrü Cristo Jesús ümo bama chütüpü israelitarü. Tone arrüna nurarri Tuparrü tücañe ümoti Abraham. Namanaiña bama oncomatü ümoti Cristo yasuriurumati Espíritu Santo au nausasürrüma.

Nüriacarrü y nurarri Tuparrü oemo

¹⁵Masaruquitaquí, apaquionsaño ümo arrüna nubacheatai icu na cürrü. Supiarrü anati taman ñoñünrrü masamunuti tratorrü aübuti quiatarri. Arrtü ticonomotati nürirri, chauqui tüvaleo manu tratorrü. Champüti puerurrü campiabo uiti, ni aiñonrriquiati. ¹⁶Arri Tuparrü urapoiti tücañe isucarüti Abraham, rranrri aicususüancanatiti y ümotito maniqui taman eanaqui nesarri familiarrü ñana. Tone nesarri tratorrü Tuparrü aübuti Abraham. Ane corobo que arrüna ñacususüancacarrü Tuparrü cuatü ñana ümoti maniqui tamantiatai, champürrü ümo bama sürümanama eanaqui nesarri familiarrü Abraham. Arri maniqui taman, tonenti Cristo.

¹⁷Irranca te suraboi ausucarü arrüna sane: Arri Tuparrü masamunuti tücañe tratorrü aübuti Abraham. Arrümanu tratorrü valeo nurria, itopiqui tone nurarri Tuparrü. Pürücü ba cuatrocientos treinta añoa itorrimianatiño manio bacüpucuca, manu nüriacarrü uiti Moisés. Chüpuerurrüpi acampia manu tratorrü aübuti Abraham ui nüriacarrü. Valeatai arrüna nurarri Tuparrü ümoti Abraham. ¹⁸Arrtü ñemanauntu ucurusüca uiti Tuparrü ui numacoconauncu ümo na corobo nüriacarrü, entonces chauqui chüvaleoquipü nurarri Tuparrü ümoti Abraham, ni oemopito. Pero arri

Tuparrü nanti ümoti Abraham sane: “Arrüna niñacususiancaca aemo ta tone nirraccumanata aemo, champü nümoche atrabaca itobo”.

¹⁹De rrepente aboma bama ñanquitio sane: “¿Isanempito ümoche acheti Tuparrü arrüna nüriacarrü?” Bueno, itorrimiatati nauqui atusi ümo macirrrianuca que ane nomünantü uimia. Arrüna nüriacarrü valeo cheperrtü iñataiti maniqui taman eanaqui nesarrti familiarrü Abraham, naqui Cristo, naqui ümoche manu nurarrti Tuparrü tücañe. Arrti Tuparrü itorrimianatiño arüba bacüpucuca ümo bama nesarrti angelerrü y uimia pasao ümoti Moisés, y arrti caüma urapoiti isucarü genterrü. ²⁰Pero arrti Tuparrü urapoiti tücañe arrüna ñacunucüancarrti ümoti Abraham, besüratai ñanitacarrti ümoti, champürrtü anati quiatarrü naqui uiche anitane isucarüti Abraham.

Arrüna nüriacarrü aneantai

²¹De rrepente anati naqui ñanquitioti sane: “¿Aensapü chüvaleoiquipü nurarrti Tuparrü auqui naca na nüriacarrü?” Inümuta: No, valeo te. Arrtü anempü nüriacarrü arrüna uiche aicoñoco nosüboriqui, auqui ñemanauntupü que arrti Tuparrü yasuriuruti oñü ui numacoconauncu ñome bacüpucuca. Pero ta champü nüriacarrü arrüna uiche uicoñoco nosüboriqui. ²²Nantü sane icu Nicororrü: “Namanaiña macirrrianuca icu na cürri ane nomünantü uimia”. Pero arrti Tuparrü yasuriuruti oñü arrtü oñoncatü ümoti Jesucristo. Itopiqui tone nirrantsümoti auquiapae, tone ñacumanatarrti oemo.

²³Tücañe champürrtü tusio oemo arrüna manunecatarrtü icütüpüti Jesucristo. Amonco oñü iquiana nüriacarrü uiti Moisés, tapü ane tarucapae nomünantü osoi. Pero caüma tütusio oemo quiti ümoche oñoncatü aübu numacoconauncu. ²⁴Arrüna nüriacarrü oemo tücañe uiti Moisés es tacana arrone alsadorarrü, bacuirara itacuti chimia. Pero caüma chauqui tiñataiti Cristo. Auqui nacarrti urria nusaca au narrrarrti Tuparrü, arrtü uicococati. ²⁵Sane nauquiche caüma chusacaiquipü mecu manu alsadorarrü, o sea iquiana nüriacarrü, itopiqui chauqui toñoncatü ümoti Cristo.

²⁶Sane nauquiche caüma arrti Tuparrü yasuriuruti año tacana aütorrti, itopiqui apicococati Jesucristo. ²⁷Nanaiña año abüriquia au nürirrti Cristo, arrti anati au nabausasü. Nabaca caüma tacana nacarrti. ²⁸Ui arrüna sane caüma arraño chepatai nabaca. Champü nümoche arrtü israelitarrü año o arrtü griegorrü, arrtü mosorrü año o champü. Chepatai naca mañoñunca y paüca. Tacana tamantai caüma nabaca, itopiqui anati Cristo au nabausasü. ²⁹Ui arrüna sane caüma arraño ito tacana nesarrti familiarrü Abraham. Arrti Tuparrü icunusüancanati año tacana arrüna nurarrti tücañe ümoti Abraham.

4 ¹Iñata quiatarrü machepecatarrtü aume: Supiarrtü anatipü taman patrón ichepe bama imostorrti, y anatito taman aütorrti, naqui chiñataiquipü niyarusürücürtri. Arrti maniqui aütorrti tacanati imostorrti, itopiqui chiñataiquipü niyarusürücürtri. Pero ta, nenarrrirrti maniqui patrón tone ito nenarrrirrti maniqui aütorrti; torrio ñana ümoti nanaiña üriacaboti. ²Pero

mientras chimiantiqui aboma bama bacuirara itacuti y itacu manu enarriboti, hasta que iñatai manu nanenese ensümunu uiti yaütoti ümoti, nauqui atorri uiti nanaiña manu nenarrirrti ümoti. ³Sane ito arroñü tücañe numo chiñataiquipü nuyarusürücü, macoconaucatai ümo yacüpucurrüma y ñapensacarrüma macirrtianuca icu na cürri. ⁴Pero numo tiñatai manu nanenese ensümunu uiti Tuparrü, icüpurutiti aütorrti icu na cürri. Anati icu cürri auqui taman paürrü. Icotatito nanaiña nüriacarrü. ⁵Pero cuati nauqui aitaesümunuti oñü eanaqui manu nüriacarrü, nauqui asamunuti oñü propoirrü tacana aütorrti Tuparrü.

⁶Arraño caüma chauqui taütorrti Tuparrü. Sane nauquiche artti Tuparrü icüpurutiti Espíritu Santo au nabausasü. Artti Espíritu Santo anatito au nausasürri Cristo. Uiti naqui Espíritu Santo caüma usucana oñü sane ümoti Tuparrü: “Arrücü Suiyai”. ⁷Arrüna nabaca caüma champürrtüqui tacana mosorrü, ta aütorrti Tuparrü año caüma. Torrio ito uiti aume nanaiña nenarrirrti auqui nacarrti Cristo.

**Ane penarrü uiti Pablo
itacu bama icocoromati Jesús**

⁸Ñemanauntu, arraño tücañe chapisuputacatipü Tuparrü. Apaserebiquia ümo bama chütüpü tuparrüma. ⁹Pero caüma chauqui tapisuputacati Tuparrü, y artti tisuputarati nurria año. ¿Causanempü caüma nauqui apicoco tatito nanaiña arrüba ñanunecacarrüma macirrtianuca icuqui nantai cürri? ¡Ümonatai napacoconauco ñome! ¹⁰Ta arraño apicocota nurria nanaiña arrüba yacüpucurrüma bama israelitarri. Apiñanaunta arrüba naneneca ensümunu uimia, y arrüba panca, pierrtaca y añoca. ¹¹Ane penarrü sobi, tapü ümonatai arrüna nirratabacaca autacu.

¹²Apisamuse tacana arrüna niyachücoi. Arrüñü chauqui tiñoocoquio nanaiña arrüba yacüpu bama israelitarri, niyaca caüma tacana arraño tücañe. Pero tapü apapensaca que ane napipüinate saübuñü. ¹³Apaquionsaño nurria ümo arrone primer niyapaseaca tanu aume. Anancañü ñaunrococa aubesa, nauquiche surapoi ausucarü acamanu arrüna omirria manitacarrü icütüpüti Jesucristo. ¹⁴Nauquiche tarucu nichaquisürücü ui manu norrocorri, pero arraño champürrtü apuncañü, chapinocapüñü, ni apipenecapüñü. Sino apasuquiucañü tacana ümoti taman ángel esauqui Tuparrü, o tacana ümoti Jesucristo. ¹⁵¿Cauta naca arrone naupucünuncu saübuñü aucutanu? ¿Causanempü atacüru naupucünuncu? Abu rraquioncañü nurria que arraño tücañe tarucu naurrianca apayura iñemo, hasta aurrianca apitorrimia iñemo nausüto, arrtü puerurrüpi. ¹⁶¡Tapü caüma autüboriquia iñemo, itopiqui na surapoi ausucarü arrüna ñemanauntu!

¹⁷Arrübama churriampü ñanunecacarrüma tarucu nirrancarrüma nauqui acuasürüma aume, abu churriampü ñapensacarüma abaibu. Rranrüma nauqui apiñoconoti Cristo, nauqui amenotü isiuma. ¹⁸Bien urria arrtü aboma bama rranrüma nauqui acuama aume. Pero tari bien urria ñapensacarrüma abaibu, y tari isamunenama ito arrüba nomirria, arrtü yaca iche amopünanaqui. ¹⁹Masaruquitaqui, orronene iñemo autacu. ¿Auchepü ñana apitusiancata que

anati Cristo au nabausasi? ²⁰Urriampaepü arrtü yacaiqui acamanu auchepe, nauqui rrapari nurria abaübu. Chütusiopü inemo causane sobi autacu.

Machepecatarrü apü Agar y Sara

²¹Arraño canapae aurrianca apicoco nanaiña nüriacarrü uiti Moisés, nauqui asuriuruti año Tuparrü. ¿Causanempü chamoncoipü nurria, nauqui atusi bien aume arrüna nantü manu nüriacarrü? ²²Ta ane corobo sane: Aboma torrüma aütorrti Abraham. Artti maniqui taman auqui nicumanacatarrti, artti maniqui quiatarrü auqui nicüpostotiatoe. ²³Artti maniqui auqui nicumanacatarrti anati icu cürrü tacanati cualquierarttai. Pero artti maniqui quiatarrü anati icu cürrü auqui propiorrü nicüpostoti Abraham, tonenti naqui samamecana uiti Tuparrü, tacana arrüna turapoitacai tücañe. ²⁴Arrüba torrü paüca tacana machepecatarrü. Ui cada taman paürrü tusio oemo taman tratorrü uiti Tuparrü. Ui manu taman paürrü cumanacarrü, nürirri Agar, tusio oemo caüma que masamunuti Tuparrü tratorrü esa manu yiriturrü nürirri Sinaí, auna cauta torrio nüriacarrü ümoti Moisés y ümo bama israelitarrü. Arrüma caüma tacana mosorrüma ümo manu nüriacarrü. ²⁵Arrüna nüri manu paürrü Agar nantü auqui besüro “yiriturrü canrü”. Ui arrüna sane nürirri maquionca oñü ümo manu yiriturü Sinaí au manu cürrü Arabia, arrüna cauta torrio tücañe nüriacarrü. Arrübama israelitarrü pohoso au Jerusalén tonema bama abomainqui isiu manu tratorrü, nauqui aicocoma. ²⁶Pero ane ito manu quiatarrü tratorrü uiti Tuparrü. Arrübama süromatü isiu, taesüburuma eanaqui manu nüriacarrü. Arroñü te uicocota manu quiatarrü tratorrü. ²⁷Itopiqui nantü sane icu Nicororrü:

Tari mupucünüña ba paüca champü niñupaümacarrü, itopiqui artti Tuparrü bacheboti ñana iñupaümacabo sürümana pünanaqui ba papaümana.

Tari botosibico ui niñupucünuncurrü, itopiqui chomonquisiopü norroco niñupaümacarrü.

²⁸Sane nauquiche arraño masaruquитайqui, chauqui tabaca au nesarrti familiarrü Abraham, tacanati maniqui quiatarrü aütorrti, naqui auqui propiorrü nicüpostoti, nürirrti Isaac. Artti anati icu cürrü, itopiqui artti Tuparrü turapoiti tücañe que tiene que acurusüti, arrtü tanati icu cürrü. ²⁹Artti maniqui aüto Agar tüboricoti tücañe ümoti Isaac, itopiqui curusüti uiti Tuparrü. Sane ito caüma arrübama israelitarrü tüboricoma ümo bama icocoromati Jesús, itopiqui yasuriurumati Espíritu Santo. ³⁰Icu nicororrü nantü sane yacüpucurrti Tuparrü ümoti Abraham: Aipene manu cumanacarrü aesaquicü, aipenerrtito maniqui aürrü, tapü chepesüro ñana naenarri ümotito. Aitorrimia nanaiña naenarri ümoti Isaac, nauqui propiorrü ahü auqui nacüposü”. ³¹Sane nauquiche, masaruquитайqui, arroñü champürrtü tacana naübosi cumanacarrü, ta tacana naübosi manu propoirrü nicüpostoti Abraham.

Tapü apiñocota arrüna urria nausüboriqui

5 ¹Arrti Cristo itaesümunuti oñü pünanaqui nürriacarrü uiti Moisés, nauqui bien urria nusaca. Sane nauquiche apiña nurria, tapü mosorrü año tatito ümo manio bacüpuca.

²Arrüñü Pablo surapoi ausucarü arrüna sane: Arrtü apasutiu nesarrüma señarrü bama israelitarrü, arrüna nürirri circuncisión, chüpuerrüüpü ayuratiqúi Cristo aume. ³Sucanañü tatito ümo namanaiña bama yasutiuma manu circuncisión: Arraño caüma tiene que apicoco nanaiña arrüna nürriacarrü uiti Moisés. ⁴Chauqui tapiñococati Cristo. Itopiqui arraño aurriancatai aye aboi esati Tuparrü ui arrüna apicocota nürriacarrü. Ui arrüna sane ensoro amopünanaqui ñacunusüancacartti Cristo aume. ⁵Pero tusiatai oemo que arrti Tuparrü yasuriuruti oñü ui arrüna oñoncatü ümoti Jesús. Arrti Espíritu Santo bayuraratito oemo, nauqui oñoncatü nurria ümoti. ⁶Uicococati Jesucristo. Champü nümoche arrtü ane osoi manu circuncisión, o arrtü champü. Arrüna manrrü cuasürü ümoti Cristo es, arrtü oñoncatü ümoti aübu nanaiña nuyausasü, y arrtü ocuasürüca oemoantoe.

⁷Aucutanu coñorrtai napapanauncu, numo amoncatü ümoti Jesús. ¿Quitipü naqui uiche apiñoco arrüna ñemanauncurratoe manunecatarrü?

⁸Abu champürtrü uiti Tuparrü, sino que arrti itasuruti año nauqui apasuriuruti Cristo. ⁹Apaquionsaño que ui chimiantai levadurarrü contoatai ocoro masarrü uirri. Sane ito pasabo arrtü anati taman masamunuti nomünantü eana macirrirtianuca. Rratorrtai mameso ñapensacarrüma uiti. Tone ito arrüna abaca aübu: Rratorrtai mameso napapanauncu, arrtü amoncoi arrüba chomirriampü manunecatata. ¹⁰Pero ñoncatü nurria aume, nauqui ane tamantai napapensaca, itopiqui arrti Señor anati auchepe. Arrtü aboma bama asioma aucuata, tiene que carrticaboma uiti Tuparrü, cualquierarrti naqui isamutenti sane.

¹¹Aboma bama namatü iñemo que rranunecacaiqui arrümanu nürirri circuncisión, abu ñapanturrüma. Namatü sane, itopiqui arrüñü chirranunecacaiquipü. Sane nauquiche tüboricomantai iñemo. Ichaquisürücatai uimia. Pero ta rranunecaca nürirrti Cristo, naqui coiñoti apü curusürü otopiqui. Itopiquiti tüboricoma iñemo. ¹²Urria iñemo arrtü iyoquiromacü uirrimiantoe, tapü asioma aucuata.

¹³Masaruquitaquí, arrti Cristo itaesümunuti año pünanaqui manu nürriacarrü, champürtrü nauqui apisamune arrüba chomirriampü, ta nauqui apaserebi aumeampatoe y nauqui acuati quiatarrü aume. ¹⁴Ane arrüna taman bacüpucurrü eana nürriacarrü, nantü sane: “Tari cuasürüti aemo aposapa tacana nacua aemoantoe”. Arrtü apisamute sane, arrti Tuparrü pucünüñati aucuata. ¹⁵Pero arrtü apahiquia aumeampatoe y aburatoquiquia aumeampatoe, iamasasai nurria, tapü autacüruca aboiyapatoe!

**Arrüna nirrântümo na cürrü nocütüpü
y arrüna uiche urria nosüboriqui**

¹⁶Sucanañü aume sane: Amonsapesio nurria nurarri Espíritu Santo, auqui caüma chapisamutepü isiu naurrianca iyo arrüba chomirriampü. ¹⁷Arrüna cürrü nocütüpü rranrü aisamune arrüba chomirriampü. Pero uiti Espíritu Santo caüma urrianca uisamune arrüba nomirria. Así que abe torrü nurrianca, y tonehio arrüba pahiyo ñomemapatoe. Arrüna nomirria churriampü ümo arrüna nomünantü, y arrüna nomünantü churriampü ümo arrüna nomirria. Chichebopü uisamune arrüna urria ui nurrianca ñoma ba chomirriampü. ¹⁸Pero arrtü apacoconaunca ümoti Espíritu Santo, champüqui nümoche apacoconaun ümo nüriacarrü, itopiqui tapisamute arrüba omirria uiti.

¹⁹Pero chanecanapatai arrüna nusaca arrtü uisamute isiu nurrainca ñoma ba chomirriampatai: Baviviquia tacana numuquianca Oecatü yusiu paüca y uisamute arrüna chomirriampü isiu nurrianca. ²⁰Manaunca ümo bama masantuca. Batrabaca aübu nuiapiaca uiti choborese. Chüsamianapü oemo niyachücoiti quiatarrü. Usuratoquiquiatái oemoantoe. Pesabatai oemo arrüna urria ñapanauncurrti quiatarrü. Otüboriquiatái. Urrianca ane aruqui nanaiñantái oemo. Chichepepü numapensaca. ²¹Urriancatai ümo nenarrirrti quiatarrü. Batabaiquia. Tarucu nurrianca ümo piertra, nauqui uba y oyorisüba. Tacana arrüna ito tüsurapoi ausucarü tücañe. Arrti naqui isamutenti arrüba nomünantü, chüpuerurrüpü aye uiti esati Tuparrü, auna cauta ane nüriacarrti.

²²Pero uiti Espíritu Santo caüma uisamute arrüna sane: Ucuasürüca oemoantoe. Tarucu nupucünuncu uiti Tuparrü. Urriantái nusaca aübuti y aübu bama osüborisapa. Masamunaunca aübuti quiatarrü. Manitaca urria aübuti. Tarucu numacumanauncu oemoantao. Uicocota isiu arrüna nusura. ²³Chotümoninauncapü. Ucusüuca nurria, nauqui tapü uisamute arrüba chomirriampü. Arrtü sane numapanauncu, chütompücanapü osoi manu nüriacarrü. ²⁴Arrübama icocoromati Cristo chauqui tiñocotama nanaiña arrüba chomirriampü nirrântümoma tacanarrtü tümocoño apü curusürrü.

²⁵Chauqui tütorrio oemo uiti Espíritu Santo osüboriquibo nuevurrü tato. Tari uisamunena ito caüma isiu nirrancarrti, enterurrü nosüboriqui. ²⁶Sane nauquiche tapü vanorrü oñüantái, tapü matümoniancaca ümoti quiatarrü, tapü pesabatai oemo nenarrirrti o ñapanauncurrti.

Apayura aumeampatoe

6 ¹Masaruquitaquí, arrtü anati abarrüpecu naqui anati au nomünantü, apayura ümoti, nauqui acoñoco tato nisüboriquirrti. Aparari nurria ümoti aübu nanaiña naubuenucu, itopiqui arrañó anati Espíritu Santo au nabausasü. Pero amasasai nurria, tapü cuatito macocotorrü aume. ²Arrtü apayuraca aumeampatoe, tütone arrüna napacoconauncu ümo yacüpuurrti Cristo. ³Arrtü anati naqui rranrü ane manrü ñapanauncurrti amopünanaquí, abu champü,